



Inatsisartuni Ilaasortaq, Jens NapätôK´, Partii Naleraq

Pajuttaatit pillugit § 37 naapertorlugu apeqquteqaammut 2020-092-imut akissut

Asasara Jens NapätôK´

26-06-2020
Suliaq nr.: 2020 - 10331
ID nr. 54197193

Inatsisartut suleriaasianni § 37 naapertorlugu Tunumut pajuttaatit, aalisakkanik aallernermit umiarsuit useqarneq ajortut, Kullorsuarmilu talittarfik pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matumap kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
Fax: (+299) 34 63 56
www.naalakkersuisut.gl

Apeqqut 1: Tasiilami aammalu Ittoqqortoormiuni upernaakkut sikuerutiaartarnera ilutigalugu umiarsuit nioqqutissanik nutaanik pajujaartalernissaat pillugu Naalakkersuisut sulissuteqarniarpat?

Akissut: Naalakkersuisut isumaqarput, Tunumut siusinnerusukkut pajuttoqartarsinnaanerani periarfissat Royal Arctic Line A/S-ip nammineerluni ilisimaarilluinnarai.

Akissuteqarnissami Royal Arctic Line A/S ilassutissaanik piniarfigineqarpoq:

"Kalaallit Nunaanni sumiiffinni assigiinngitsuni sikup qanoq inneranut Royal Arctic Line ataavartumik malinnaasarpog. Minnerunngitsumik ukiup annersaani illoqarfiit pajuttaatinit tikinneqarsinnaaneq ajortut soorlu Tasiilaq, Ittoqqortoormiit, Uummannaq, Upernavik il.il. malinnaavigisarlugit.

Islandi aqqusaarlugu Danmarkimit Tasiilamut, Tasiilamiillu Danmarkimut, Kalaallit Nunaatalu sinnerani Reykjavik aqqusaarlugu assartuisarnerit pitsaanerulersikkumallugit, Royal Arctic Line-p assartueriaaseq nutaaq atulissavaa. Tamanna 2020-p ukiorartulernerani atuutilissaaq. Umiarsuaqarnikkut sikup qanoq innera malinnaavigineqarsinnaanngussaaq, taamaalillunilu assartugassaqartillugu, ullutsinnut naleqqiullugu, kingusinnerusukkut misiliisoqarsinnaalissalluni. Novembarip qiteqqunnerani Nanoq Arctica pisortatigoortumik naggammik tikittarpoq. Sikusimanagera silalu apeqqutaatillugit, novembarip naanerani tikinneqarsinnaasassaaq. Taamaattumik ukioq kingullermut sanilliullugu ukioq manna pajuttaat ataatsimik amerlanerusumik tikittusaaq saniatigut, ataasiaqqilluni tikinneqarsinnaasassaaq. Tikinneqaaqissinnaanera "aappalaartunik" nalunaaqutseqqavoq, imaappog sikusimangippat, silalu atoruminarpat aatsaat tikinneqarsinnaasassaaq.

Aappaagumut (2021) Nanoq Arctica pisarnerminit siusinnerusukkut Tasiilamut tikissinnaasassaaq. Massakkut nalinginnaasumik juunip aallartisimalernerani pajuttaat siulleq Tasiilamut tikittarpoq, 2021-miilli maajip qiteqqunnerani tikinneqartalissasog anguniarparput. Tassanngaanniit ullumikkutut sapaatip akunneri pingasukkaarnagit, ullut 14-ikkaarlugit Tasiilami umiarsuaqartalissaaq. Imaappog, siku silalu apeqqutaatillugit "aappalaartunik" nalunaaqutsersimasumik siusinnerusukkut tikittoqarsinnaalluni kiisalu ukiup naanerani "aappalaartunik" nalunaaqutsersimasunik

marloriarluni tikittoqarsinnaalluni, pajuttaat ukiumut aqqanileriarluni tikinneqartassaaq. Siku silalu apeqqutaatillugit tikinnerit katillugit 13-it.

Ittoqqortoormiit Nanoq Arctica-mit tikinneqartassasoq aamma pilersaarutaavoq. Ittoqqortoormiitut nassiussat Reykjavikimiit ingerlateqqinneqartassapput, Kitaanit, Islandimit, Danmarkimiillu aamma assartorneqartassapput. Ittoqqortoormiini ullutsinni atorneqartartunik, Nanoq Arctica aamma prammeqassaaq, lastbileqarlunilu. Taamaanneratigut Qaanaami prammit lastbilillu atorneqartartut isumalluutigineqarunnaarlutik, Ittoqqortoormiitut tikittarneq eqaannerulissaaq. Taamaattumik siku silalu apeqqutaatillugit Ittoqqortoormiit nalinginnaasumik tikinneqartarneranit siusinnerusukkut tikinneqartalernissaa anguniarneqarpoq. Pajuttaatip naggammik tikinnissaanit kingusinnerusukkut tikittoqassasoq pilersaarutigineqanngilaq, piffissamimi tassani nittaalaq sikulu patsisaallutik Ittoqqortoormiit aamma Nerlerit Inaat tikinneqarsinnaassasut qularnarmat".

Apeqqut 2: Uummannamut aammalu Upernavimmut upernaakkut umiarsuit qaleralinnik aallertut nioqqutissanik usisalernissaat Royal Greenland-ip aamma KNI-Pilersuisup ikioqatigiisinnerisigut Naalakkersuisut sulissutiniarpaat?

Akissut: Royal Arctic Line-p angalanissamik aalajangersimasumik pilersaarutaasa avataatigut umiarsuarnik assartuisarnerit taaneqartut, aalisakkeriviit, KNI-Pilersuisup Royal Arctic Line A/S-illu akornanni suliassaapput. Tamatuma saniatigut apeqquteqaammut siullermut akissut takuuk.

Apeqqut 3: Kullorsuarmi umiarsuarnut talittarfik pioreersoq atorneqanngitsoq Naalakkersuisut qanoq aaqqiiviginiarpaat?

Akissut: Suliffissaaleqineq akiorniarlugu 2014-imi immikkut ittumik aningaasaliisoqarpoq, aningaasaliissutillu taakku iluaqutaanerpaaffigisinnaasaannut siunertanut aalajangersimasunut aningaasaliissutigineqarnissaat siunertarlugu Royal Arctic Line A/S, atuisullu allat oqaloqatigineqarlutik.

Suliffissaaleqinerup akiorniarneqarnissaanut immikkut ittumik aningaasaliissutigineqartut killiliussaasa iluini, talittarfik tallineqarsinnaasimannngilaq. Taamaattumik RAL-ip nunaqarfinnut pajuttaataat isumannaannerusumik pituttorneqarsinnaaqqullugit, qeqertami pituffillioqarluni. Suliaq taanna naammassereermat, talittarfik naammassineqanngitsoq pineqanngilaq.

Neriuppunga apeqquteqaatitit qulaani allaqqasuni akineqartut.

Inussiarnersumik inuulluaqqusillunga



Karl Frederik Danielsen